


PL
2463
Z6c58
V.4



駁呂留良四書講義

上論下

子使漆雕開仕章

呂留良云使開是就他材分可使說開是因他篤志所見者大不肯小用又有出於聖意之外者故說之若仍要講說其可仕却小看了未信道理堯舜事業亦只是一點浮雲過太虛耳故曰曾點漆雕開已見大意莫要看大了仕字朱子篤志正指見大意不安小成但恐人誤看入過高處故下篤志二字便著實卽所謂進取也若止就政事推行處講并篤志二字亦錯看小樣矣

斯卽仕之理凡經書斯字此字未有不根上文者蓋仕之理小言之則小大言之則大爲宰治賦仕之理也期

月已可。三年有成。亦仕之理也。出處雖殊。其理則一。或人問朱子。是見得吾心之理。或是出仕之理。曰都是這道理。不可分別。按此。則只就仕之理上。能見大意。不安小成。便可語行藏之道。何必將斯字躲閃仕字。乃謂濶大耶。留良謂曾點漆雕開已見大意。不要看大了仕字。堯舜事業。只是一點浮雲過太虛耳。夫點開之見大意者。乃侍坐章所謂人欲盡處。天理流行。在出處語默處。處有之。留良恐單粘仕上講。不足以該體用之全。而不知善會斯字者。固未嘗言用而遺體也。程明道浮雲太

虛之言。卽孟子所性分定。大行不加之旨。而留良援此以爲不將仕字看大之証。奚啻去而千里。

孟武伯問子路仁乎章

呂留良云。仁道之大。只在事物之間。非金谿黑腰子也。仁却又不在事。見得到此方許。汝具一隻眼。

朱子以仁爲當理而無私心。何等直截分明。留良乃云。仁只在事物之間。又謂仁却又不在事。何其說之反覆蹺蹊也。

子謂子貢曰。女與回也孰愈章

呂留良云。孰愈一問。是探竿影草。不是閑評。較見聖人造就子貢用處。心切。又云。弗如也。句不是活不。

是奪不是回機反縱乃殺句也此句須殺得盡下句纔有轉身之妙若但從上文引逗作隨波逐流看却不見金剛王劍作用又云此二句純是聖人引進子貢妙用有縱有奪有殺有活却須向子貢境界火候中勘驗弊病分明方見聖人四路把截逼拶到離鉤三寸處真是老婆心切

留良極闢禪學而此三條却純用禪語以此解經其侮慢不敬甚矣。

子曰吾未見剛者章

呂留良云夫子突然一慨必有指歸而茫然難測所以來或人之對或人舉棖之氣象有似乎剛其所謂慾有難識者故夫子辨之若粗淺嗜慾或人豈冒昧至此故程子下悻悻自好此卽爲慾亦此意也慾之非剛是就棖而論未可以盡剛之理盡夫子未見之意然要之大義亦不外是得或人一舉界限已自分

明耳

剛與慾。一正一反。緊相針對。集註甚明。留良乃謂欲之非剛。是就槎論。未盡剛之理。誤矣。人之有慾者。未必皆同於槎。或好貨好色。貪榮嗜勢。有所耽戀者。皆是也。惟槎悻悻自好。其貌似剛。不知此卽爲慾耳。故謂槎之一人。未足以槩有慾無剛之品。則可。謂無慾不足以盡剛之理。則不可。

子貢曰夫子之文章章

呂留良云夫子之文章是子貢一生家當到此得聞性與天道之妙乃爲此言然只在文章得聞中打通

性與天道不可得聞消息仍不離子貢家當其見乃更高一層

朱子語類有云。子貢之聞性道。是後來聞孔子說。不可硬做。是因文章而得。今留良謂子貢得聞性道。原從文章得力。是明與朱子背馳也。

呂留良云。子貢得聞性道。原從文章得力。文章性道。可知是一線事。只是火候不同耳。得聞文章。然後可言性道。文章之可聞。亦是子貢分上如此。未必人人得聞也。有不知文章者。有止於文章者。有由文章而上之者。有既得聞性道而用功仍在文章者。此中節次等第。正自不一。

留良見理多差。只平說道理中。語句疵病不少。如此段所云。文章之可聞。亦是子貢分上如此。未必人人可聞。

也。夫文章威儀文辭也。一入聖人之門。則見聖人之威儀。接聖人之言辭矣。安得而秘之。且此乃下學入道之始也。若文章亦必子貢而後得聞。則自子貢以下。七十三千之徒。聖人復用何道教之耶。若謂不得其解者。雖聞如不聞。此可以言性道。不可以言文章。性道者理也。聞性道而不知其理。卽非性道矣。文章則有形象法迹焉。識大識小。存乎其人。烏有不可得聞之文章哉。又謂有由文章而上之者。有旣得聞性道而用功仍在文章者。請問此二種人。爲同爲別。旣由文章而上之矣。則所

見者皆性道也。顏曾之流也。用功在文章。固卽事而見理。縱不用功在文章。亦非略迹而蹈空也。留良分此二等。將謂由文章而上者。尚有過於高遠之弊。必須仍在文章上用功。方爲貼實耶。豈非管窺之見。

子路有聞章

呂留良云。此爲子路寫生耳。若寫急勢。有一痕未盡。子路精神不活現。便不是記者描畫其身說法。然子路弊病亦在此。看聖人答聞斯行章。如何須曉記者言外微意。

吳氏謂子路一於敢行。不復置思。故夫子嘗以兼人而退之。朱子謂此論可補諸說之未備。然於本註不一及。

者。正以記者之意。專美勇行也。留良剽吳氏說。遂謂記者言外有微意焉。則失之鑿矣。

子曰臧文仲居蔡章

呂留良云。因文仲有知名夫子。卽此事以辨其知。非以不知譏此事也。故不云不知。而云何如其知。猶曰人之稱其知也。其謂之何爾。

註云。豈得爲知。語類云。聖人專主不知而言。皆直下判斷。並無遮掩。留良乃云。卽此事以辨其知。非以不知譏此事。支離牴牾。一至於此。

季文子三思而後行章

呂留良云曰子聞之則魯人之稱頌以爲美談可知然足以誤人之思故夫子正之是論思不是論文文子而文子之得失亦在其中與前後各章論人答問之例自別

留良謂此是論思不是論文子。謬也。此章與前後章一例。列於忠清愚知之間。正見記者深意。文子黨襄仲而立宣公。及其斥莒僕也。侃侃然彰人臣之直。迨襄仲死。其子歸父欲去三桓以張公室。與公謀而聘于晉。未返而宣公薨。文子乃訟言襄仲之罪。而逐東門氏。歸父奔齊。此皆三思中計較利害奸巧處。季氏之強實始文子。夫子不便斥言。卽借魯人所稱三思一節斷之。惡之至。

也。若泛論思。則周公兼三施四之時。夜以繼日。思豈得以再爲限耶。

子曰甯武子章

呂留良云。愚字從旁人比較而見。武子固不自命爲愚。亦非武子正面全身斷語也。只在知巧者一對照。便見其愚。卽其愚處。便是不可及。若以其免難成功。見愚之不可及。卽是功利作用。此吳下人之所謂詐。呆非武子之愚也。要使衛侯終不復國。武子卒及於難。其愚豈可及耶。

武子止知有君。不知有身。但身不可保。則君必不可濟。故兼保身濟君言之。當日事勢之必不可爲。人盡知之。而武子獨不以爲然。曰。烏知君之不可濟。身之不可保。

乎。此如人子之事父母。當彌留之頃。猶必多方調治。至於絕而復。三日而後殮。猶冀其復生。此所謂愚不可及也。武子之愚之不可及。正以其不避艱險。務期免君於難。而卒能成功。以遂其忠愛之志。留良乃云。以免難成功。見愚之不可及。卽是功利作用。然則爲人臣者。值艱難之會。必君與身俱喪。而後謂之非功利乎。

呂留良云。愚字只與乖巧字對。從來萬死一生之事。世之打乖者。便不肯爲。二氏之學。講到極精處。亦只是此理。此武子所以不可及也。成公之終復。特幸而濟耳。至於成敗利鈍。非臣之所能逆睹也。亦武侯之愚也。故小人喻于利。皆知也。君子喻于義。皆愚也。以此思愚。愚可知矣。

武子之愚。註中分明有兩層意。所謂智巧之士。深避而不肯爲者。武子之愚也。而能卒保其身以濟其君。則愚而智矣。但武子當此事勢。萬無可爲。惟愚而後能任之。其智處亦從愚處做出。故總以愚字該之耳。留良未詳註意。乃云成公之終復。特幸而濟耳。此亦未然。武子之事成。公固無必濟之理。然謂成公之復。全出天幸。無賴於武子之力。則不可。觀武子當時。納餽貨醫。皆有妙用。則其他可知也。武子所處者。全君安國。雖有智巧。亦是赤心中流出。何害其爲愚哉。

顏淵季路侍章

呂留良云盡天下之老友少而安信懷之此其盡也然必老吾老以及人之老幼吾幼以及人之幼其中親疎貴賤有多少等級便有多少安信懷法施在無此也安信懷不成這便是一篇西銘道理

語類問老安少懷其間多有節目今只統而言之恐流兼愛朱子曰此是大概規模未說到節目也按聖人之志如化工肖物大以成大小以成小各得乎性命之正而天地未嘗容心故會得夫子老安少懷氣象則親疎貴賤之序已在其中不煩添補留良拾或人問語謂安信懷有多少等級而於朱子大概規模之論全不理會

其粗疎鹵莽類如此。

子華使於齊章

呂留良云有謂與栗辭粟二子原未嘗不是夫子特廣其意耳滿肚皮奈何不下這一部史記憤懣肝腸看得一班俠客畸人爲世間絕頂人物不難將孔夫子說話當假道學常談看此種趣識誤學人不小

朱子曰聖人以義制事雖極謹嚴而其宏裕寬大優暇廉退之意又未嘗不行乎其間故雖以富爲不當繼而不直拒冉子之請雖以祿爲當受而不責原思之辭學者未得中行不幸而過寧與母吝寧介母貪庶不失聖人之意觀此則以與栗辭粟爲良友廉吏愈襯得聖人

道理更精一層。若以聖人之言。而盡抹二子。將有如朱子所云其流之弊。使吝者託於不與之說。以蓋其陋。貪者託於毋辭之說。以便其私。其爲人心害不小也。至史記所載游俠之徒。扞當世之文網。班固猶羞稱之。而留良之意。竟欲以擬聖門之高弟。亦可謂無忌憚之甚者矣。

子曰回也其心三月不違仁章

呂留良云不違與至皆有工夫只是下工夫處不同其中有同原處有天懸地隔處

孔子於顏子之問答以克己復禮。於仲弓答以見賓承

祭不欲勿施。於司馬牛答以言訥。於樊遲答以恭敬忠。果能居處恭。執事敬。與人忠。豈復有不克之已。不復之禮乎。日月至者。當其至時。便是全體之仁。朱子曰。日月至。亦是徹底到一番。又曰。若論至處。却與久而無息一般。是不違與至。但有生熟久暫之分耳。若云天懸地隔。則是曾閔以下。皆不得與於仁之數矣。況留良旣云。其中有同原處。豈有原同而不歸於一致。至於天懸地隔者乎。

子謂子夏曰。女爲君子儒。章

言
呂留良云爲儒而從勲業功效起脚卽犯
爲人功利之病正不免於小人儒之歸矣

儒者之學有體卽有用可以自治而不可以治人卽修
己之功亦虛矣今以勲業爲功利之病是不知從古聖
賢勲業皆從心性中發出正與朱子簿書錢穀皆爲爲
己之義相悖也功效二字亦說得混自治治人皆有事
功皆有效驗特不可預計其效耳以功效爲功利亦似
是而非之說也

子曰誰能出不由戶章

呂留良云此與人莫不飲食節同出必由戶亦卽是
道但小事粗節耳舉以警人最親切有味若作譬喻

說則由戶在道外矣。人卽不由道無時不在道中。天下事物總無一件不在道中。隨處提起便見。又云因由而有道名。道卽在由處見。故訓道曰路。

由戶自是譬喻。謂道之當由。猶人之出入。必由乎戶也。留良乃云。出必由戶。亦卽是道。但小事粗節耳。果爾。則當云誰能出不由戶。何故他事之不由道。不當云何莫由斯道也。訓道曰路。正見道之不可不由。今云因由而有道名。道卽在由處見。將謂人不由道而道遂絕於天地之間乎。

子曰質勝文則野章

呂留良云聖人當下道箇彬彬已是箇成德氣體只是如何會彬彬況云然後君子則未及彬彬時固學者事也故朱子加入學者當損補以成其彬彬則彬彬方有下落而然後句亦分明人謂君子二字不可作贊語翫然後語意是上四字正有損有餘補不足工夫不指現成說註中學者云云正解文質彬彬成德云云正解君子然則君子何嘗不可作贊語但不可以文質彬彬四字作君子贊語看耳

朱子曰言文質彬彬自然停當恰好不少些子意思慶源輔氏云至於成德則文質斑斑然相雜而適相稱有不期然而然者觀此可知註中損有餘補不足乃言學者下手工夫至於成德則不待調劑自然文質得中矣然後二字緊承文質彬彬對上兩則字謂學者造就至

此方可謂之君子。留良乃以損有餘補不足作彬彬正解。謬也。且如留良之說。則彬彬固學者事矣。如何又云當下道箇彬彬已是成德氣象乎。

子曰人之生也直章

呂留良云生字指有生終始全理自穉至老爲彭爲殤無非生也只現在此刻直則是生罔卽幸免蓋生之道理本合如是耳此程子所謂生理本直也讀者錯認本字遂將生字看做生初之生要追原反始以直字當父母未生前本來面目看害道不小矣其病總坐不與下句相照應若將直字對罔字人之生對幸而免反覆思議自無此病

朱子曰上生字爲始生之生下生字爲生存之生此論

何等直截。大凡聖人言理。多自人之初生言。蓋天以是理賦於人。人得之而後有此生。程子所謂生理本直正。謂此也。留良乃將兩生字俱作生存之生。又謂讀者錯看生字。以直字作父母未生以前本來面目。夫既以生爲生初矣。何至認作未生以前本來面目乎。留良妄生意見。害道實甚。反云讀者作生初解爲害道爲可怪也。

呂留良云人之生也直。此句當緊照下句講。有此直乃有此生。人之所以爲人者此也。罔則生之理已絕。雖生亦幸免耳。後人誤解程子生理本直句。將本字作自然無爲看。於是講章遂有卽生是直之說是。重生字不重直字。下句如何振合其病。亦從生之謂性與良知之說而來。

朱子曰。惻隱羞惡。都是本心自然發出來。若順這箇行。便是直。此與程子生理本直之意同。順其本心而行。卽任真自然之謂也。與告子生之謂性。專以氣言者。固天淵相隔。卽陽明致良知之說。以本體爲工夫。亦與此無涉也。

子曰知之者章

呂留良云。爲學於知好。煞好用工。到樂底地位。程子所謂功夫尤難。直是峻絕。又大段著力不得者。濂溪之尋孔顏樂處。延平之融釋脫落。皆此意也。

朱子曰。此樂之者之字。是指物而言。是有得乎此道從

而樂之也。如顏子之樂。又較深。是安其所得後。與萬物爲一。泰然無所窒礙。非有物可玩而樂之也。據此。則樂之者。雖有融釋脫落意。而與孔顏樂處。自是不同。蓋其樂者。其心自樂。樂之者。以所得爲樂。樂之之後。亦能漸漸自有其樂。而方有所得。固未能泯乎樂之之迹也。今混而同之。亦懵然於樂字地位矣。

呂留良云。三之字。明指聖人之道。原不可指禮樂刑政理數。亦何嘗空微無倚耶。若離却道字。卽貪財好色。亦何不可。附此四句耶。

知之好之樂之。三之字。自然指聖人之道而言。但云不

可指禮樂刑政理數。又非空微無倚。此非知道之言也。夫聖人之言。未有空微無倚者。必實有是理。實有是事。而後舉以教人。不獨此章爲然也。至所謂禮樂刑政理數。聖人之道。豈有外於此數者哉。精粗本末。原是一貫。事之所在。卽理之所在也。如中庸一書。五達道九經。以及文武周公之制作。無非禮樂刑政之事。而其原皆出於天命之性。亦可曰不當指此以爲聖人之道耶。謬亦甚矣。且易曰形而上者謂之道。形而下者謂之器。道卽理也。今云不可指爲禮樂刑政理數。夫禮樂刑政猶可

言
三
曰於道有形上下之分。而理字亦在所非之中。然則所謂聖人之道者。復是何物耶。道與理爲一耶。爲二耶。後又引貪財好色爲言。則愈支離而謬悠矣。

呂留良云。聖學工夫。只有知行兩端。知字中工夫最多。到得箇知之者。火候已是一半好。與樂總是行中火候。若不會知得也。無從好樂。卽有所好樂。如金谿姚江之學。亦能使人鼓舞顛狂。却只是差異。不可謂之好樂。總只謂之不曾知也。

集註張敬夫曰。知而不能好。則是知之未至也。朱子曰。好之者。是知之已至。分明見得此理可求。故心誠好之。又謂呂氏知之則不惑。其說稍深。此章知字只謂好學。

者耳。未到不惑地位。又曰此亦謂知義理之大端者耳。觀此。則是至於好而後爲知之至。非首句知之。卽與好樂平分一半火候也。且不但好字中有知。卽樂字中。義之精。仁之熟。亦兼知行在內。豈可專截好樂屬行中火候乎。

子曰中人以上章

呂留良云此章只在材質上論語當其時卽中人以上亦有機候因緣中人亦有用困勉之功造到可語者却又別是一話非此章本義也

謝氏曰此論上下之分。非不移之品。特言其操術淺深

耳。朱子曰。或是他工夫如此。或是他資質如此。聖人只說上下時。便都包在裡面。留良乃云。只在材質上論。亦有用功造到可語者。又別是一話。果如所言。則夫子語曾子以一貫。何必待其真積力久。曾子魯矣。子貢明敏。何必待其積學功至。而後發其疑而告之耶。

樊遲問知章

呂留良云。知者之事。仁者之心。兩者字是從現成指。示與其言也。初不憂不懼一例。惟其是知仁故事。與心如此不說如此做知仁也。又云。務義兩事。若不足爲智。正是智處。由事而指智。故不先下智者字。事可指而心難形。故就現成仁者。指出他處心積慮樣子。與仁者其言也。初相似。先下仁者字。正有意在。

務義敬神就事上說先難後獲就心上說皆指現成之知者仁者而言。本文下段云仁者上段不云知者各隨文法之便並無深義。故註中並說知者仁者留良云知者之事仁者之心兩者字是從現成指示又云由事而指知故不先下知者字。事可指而心難形故就現成仁者說不與集註相刺謬乎。

呂留良云知鬼神之當敬當遠只合如此必通于死生晝夜之故矣。知其說者之於天下其如示諸斯乎。彼諂事鬼與蠻作無鬼論者其愚則一皆不免于爲鬼所揶揄者也。

或問程子知鬼神之道然後能敬能遠否。曰亦未說到

如此深遠處。且大綱說當敬不惑也。謝氏云敬鬼神而遠之。知鬼神之情狀也。朱子謂其未見所以敬而遠之之意。亦太漫矣。今留良云。知鬼神之當敬當遠。必通於死生晝夜之故。與程朱之意顯相馳背。且鬼神雖兼內外祀典。原未論到仁人饗帝。孝子饗親。理無不明。誠無不格。地位今牽入。知其說者之於天下。如示諸斯。懸隔不倫甚矣。

子曰知者樂水章

呂留良云。此節知仁雖指兩種人是。就其資稟現成處說。不論工夫。亦不論全體也。三截節節自爲形容。

無淺深之義亦無聯貫之情 又云就兩種人資性
大段而言故有此分別與好仁惡不仁章相似若說
知仁道理工夫兩者原分不得 又云三股隨意舉
似說箇大段意理固無貫串之義亦無重動靜而以
上下發明中段之說予
論此章正不喜如是

註云有似於水故樂水有似於山故樂山動而不括故
樂靜而有常故壽程子亦謂知者樂於運動若水之流
通仁者樂於安靜如山之定止動則自樂靜則自壽蓋
動靜者知仁之體而情與效因之留良必云無聯貫之
情無貫串之義直欲盡翻程朱之案而駕乎其上傲戾
堅僻肆無忌憚甚矣

子曰君子博學於文章

呂留良云博文約禮功有兩層事只一件之字卽指上句

朱子答或人問曰。博文約禮學者之初。須作兩般理會。而各盡其力。久之見得功效。却能交相爲助。而打成一片。若合下便要兩相倚靠。互相推託。則彼此擔閣。都不成次第矣。又問約禮只是約其所博者否。曰也不須如此說。有所未知。便廣其知。學旣博。又須當約禮。註中學欲其博。守欲其要。亦是分開平說。又曰禮字不可只作理字看。是持守有節文處。可見學文只是廣求事物之

理。及反諸吾身而得其所守之要。只以一箇禮爲歸宿也。若以約之之字指文言。是將所學之文歸到禮上。仍是講究貫通之意。不見踐履切要處。且必待所學旣博而後約之。則未博時便不須以禮。正所謂互相推託。彼此擔閣也。朱子明曰。須兩般理會。各盡其力。何云事只一件乎。

子貢曰如有博施於民章

呂留良云先儒謂仁字最難訓以其不著事爲不論地位也。如博施濟衆豈不是仁者之事。然夫子却以爲聖而不止於仁。仁譬之水。聖譬之海。謂海非水固不可。然非必海而後水也。則水自另有件物在。惟欲

立立人欲達達人乃仁之體能近取譬乃爲仁之方只此便是夫子善訓仁字又云有心便有事不論事只論心則心亦易詭而遁矣夫子之意非謂博施濟衆專求諸事而不是心亦非謂立人達人專求諸心而更無事也但心從近推事卽從近做不如博施濟衆之求諸遠且難耳

留良於評語云。聖門之仁。未有離事物而直指心性者。卽下文立達近取之方。庸詎非事耶。此却又云仁字難訓。以其不著事爲。不論地位。下段又撥轉說有心便有。事。一說而反覆遷變如此。殊不可解。朱子曰。博施濟衆。固仁之極功。譬如東洋大海。固是水。但不必大海之水。方爲水。只瓶中傾出來底。亦便是水。留良勦用此說。而

於非必海而後爲水。下接云。水自另有件物在。如其說。則是離海言水。乃別指一物而謂之水。其實非水也。不通甚矣。仁者有立達之心。卽有立達之事。立人達人。卽是施濟。不必博衆而後謂之施濟。而後謂之仁也。留良撫拾先儒語。矜爲獨得。每小變其說。輒與立言之旨。天懸地隔。徒見其詐僞妄誕而已矣。

子曰述而不作章

呂留良云述作本無低昂述而不作正爲理不當作耳

樂記曰。知禮樂之情者能作。識禮樂之文者能述。作者

之謂聖。述者之謂明。明聖者。述作之謂也。豈得謂述與作不分低昂乎。謝上蔡云。事有述有作。至於道則無述作之殊。或問謂聖人不敢當折衷之名。而自託於傳述。謝氏以其卑而恥之。故必侈其說以自高。失聖人之意遠矣。本註所謂事雖述而功倍於作。理固如此。若夫子意中。正以述之遠遜於作。猶可以之自居耳。留良拾謝氏之餘唾。矜爲妙解。而不知其謬於聖人立言之意也。

呂留良云。朱子謂砒礬可食。當食之。若尚猶豫商量。卽不可謂之篤信也。

朱子斷無謂砒礬可食之理。如或傳有此說。亦宜辨明。

喪欲速貧。死欲速朽。曾子親聞諸夫子者。而有子尚知爲有爲之言。此正其嗜學篤信聖人處。蓋古之學者爲已。信而好之。亦以求得於心也。聖門篤信好古。無如曾閔。然曾子於小功不稅。則曰是遠兄弟終無服也。而可乎。閔子要絰而服事。則曰若是乎古之道不卽人心。此皆先王一定不易之制。然心所不安。輒不肯苟同如此。夫子信而好古。然於三代之禮。未嘗無取舍。如記中孔子善殷。及云殷已慤。吾從周之類。不一而足。何嘗以混沌無皂白爲信好也。朱子最尊信程子。然語錄中。於程

門記錄之誤者。未嘗不標而出之。其編程子遺書。以李端伯爲首。以記錄之善也。以暢潛道爲殿。以記錄多誤也。此乃朱子所以善於尊程者。豈以一槩不別白爲當然乎。留良乃云。若朱子謂砒礬可食。宜卽深信而食之。此正告子不得於言。勿求於心之病也。以此爲篤信朱子謬矣。此等議論。蔽惑人心。而爲害於學問者。甚大。學者所宜明辨也。

子曰默而識之章

呂留良云。三句看來。默識似知止。至善學不厭。似明明德。教不倦。似新民。只默與不厭。倦見聖人渾然本

分如此看三句氣象如何問註云三者已非聖人之
極至恐不須如此恢張曰固是然於此亦須見箇聖
人意中所見底
模樣定不小小

以學誨配明德新民可也以默識比知止至善則偏甚
緣留良解大學聖經章以止至善專重在知又妄以此
章識字作知字故欲比而同之夫止至善之非專屬知
不待言矣卽此章註云識記也默識謂不言而存諸心
也默識之非專屬知明矣况默識是切近工夫止至善
乃明新極功以此喻彼是之謂不知類也

子曰志於道章

呂留良云艾千子曰張子韶咏依於仁句云試看迷途一瞥矇若還無相豈能通力行未到安身處且可依他入箇中然畢竟不合謂其看依字淺也莫若從註爲是唐宋諸儒說經未經朱子採取者猶夏商周之書爲夫子刪去者終不可傳耳艾千子此論已分明然謂子韶看依字淺却不當其罪他看得仁字不好耳故云無相豈能通他只將仁當箇瞽者之相則所爲安身處者非仁矣湛若水教人隨處體認天理亦近似好話然其所指之天理乃子靜之黑腰子也今欲破諸邪說須先認取仁字端的

張九成始學於楊龜山後師釋宗杲杲語之曰左右旣得槩柄入手開導之際當改頭換面隨宜說法使殊途同歸則世出世間兩無憾矣此朱子所謂張氏論著皆陽儒而陰釋也或疑金谿之學本之范陽而實不然金

谿主靜之學。其流弊近於禪。若無垢則委心皈依矣。白沙甘泉。自是子靜一派。然自然宗旨。從與點章得來。章楓山述朱子語。謂專理會與點意。恐入於禪。白沙曰。朱子時。人多流入異學。今人溺於利祿之學深矣。必知此意。然後有進步。觀此。則白沙之論。亦所謂矯枉過正而不自知其近於禪也。且所著述。多稱說程朱。與餘姚之徒。公然與朱子爲難者。亦復有間。至隨處體認天理。亦係白沙語。白沙謂日用間。隨處體認天理。著此一鞭。何患不到古人處。又曰。自茲以往。尚有分殊處。合要理會。

此與聖門先博後約之旨相違悖。然較之以本體爲工夫者。猶彼善於此。况隨處體認天理。宋儒嘗有此說。必謂所指天理。另是一種。亦過刻之論也。仁道精微難言。先儒論之屢矣。無垢固不識仁。如留良者。又烏足與言仁哉。

呂留良云。朱子云。藝是小學工夫。論先後則藝爲先。三者爲後。論本末則三者爲本。藝爲末。習藝之功。固在先而游者從容潛玩之意。又當在後。文中子謂志道據德依仁而後藝可游也。此說自好玩。此一條則游藝輕重先後之理盡矣。故上三句可次第遞說。而游藝句不可坐煞在依仁後。與依仁相比屬亦不可。將此句另側重似反。精妙於上三句也。

朱子謂自志道至依仁。是從粗入精。自依仁至游藝。是自本兼末。能依於仁。則其游於藝也。蓋無一物之非仁矣。又曰。藝雖小學。至依於仁。既熟後。所謂小學者。至此方得他用。是皆以游藝坐在依仁後。與依仁相比屬也。文中子言志道據德依仁而後藝可游。本謂游藝當在依仁後。朱子亦以此取之。留良乃引之以證其游藝不可坐煞在依仁後之謬解。是未達於文中子之言。並不識朱子取之之意也。

呂留良云。功夫到聖處。本原大端已定。這上面神妙。却正在末處。中庸所謂聖人有所不知。不能者。不知

不能不礙其爲聖人更
知更能不又加神妙乎

中庸講聖人不知不能乃謂四海之廣古今之遠有聖
人見聞之所不能及者此言道之費也今云不知不能
不礙其爲聖人更知更能不又加神妙乎是以聖人之
不知不能爲未能游藝也是以游藝爲窮究聖人所不
知不能之事也不通一至此乎

子謂顏淵曰用之則行章

呂留良云必也者也四字最活如此人方可行軍能
懼能謀見大本領不泥定行軍說又云單講箇懼
字是聖賢主敬本領此懼字却大不是此處本分此
處懼字貼定臨事說單講不得要之源頭固自大懼

字生來見得此意本
分道理又高一格耳

南軒解此節云。臨事而懼。好謀而成。古人所以成天下
事而不失也。豈獨可行三軍而已哉。朱子論之曰。此本
爲行三軍而發。故就行三軍上觀之。尤見精密。前代輯
大全者。但錄南軒之解。而反遺朱子之辨。致後人輒以
推開泛說爲高。而無當於聖人發論之本旨。此留良最
活不泥之解。陰勦南軒而顯謬紫陽者也。至主敬之云。
亦出大全朱氏公遷之說。事有鉅細。敬無兩心。而留良
區別源流。強分大小。抑何其支離糾纏。有異於朱子卽

是戒謹恐懼之心之說乎。

子曰富而可求也章

呂留良云如不可求主命說爲是若謂義不可求如字口氣欠的聖人言語每下一步以就人正是決其不可意

義不可求伊川南軒俱有此說而或問謂此章之意蓋爲中人而發以是曉之庶其易知而有信留良之說勦此。

冉有曰夫子爲衛君乎章

呂留良云方夷齊去國時固已不計孤竹之有後矣

仁以孝爲先。孝以宗祀爲重。使夷齊並不計孤竹之有後。而但以讓國爲高。是乃不孝之大者。焉得謂之仁。又焉得謂之求仁乎。留良以已之心度聖人。而敢爲悍然不顧義理之說如此。

子所雅言章

呂留良云。此言聖人尋常言語之間。引據辨說。大約不出此耳。不是日提此三經爲課程也。又云。首喝一句末。又復繳一句。中間列數一句。純是記者會通從前語言。從中指點綱宗出來。與學者做思議。又云。聖人初不曾立個綱宗。謂言必軌於此。在聞言者亦隨人隨時各受教。而退未嘗總聚同參。如後來語錄公案也。記者日久熟會得如此筆之於書。令後人領會聖人教人全身其意無窮。又云。不是聖人以

此立教亦不是偶然道及須看記者熟之平日參之
同人悟得聖言大都不離近是雅字情景義旨乃得

朱子曰古之爲儒只是習詩書執禮只這詩書大而天
道之精微細而人事之曲折無不在其中禮則節文法
度聖人教人亦只是許多事本註云皆切於日用之實
故常言之可見此是切實道理非有元妙之說留良乃
云記者會通從前語言從中指點綱宗出來與學者做
思議似聖人之言幽眇空幻得門人指點宗旨方可默
坐相參何異禪門衣鉢乎旣又自覺其非而改之曰聖
人初不曾立個綱宗聞者亦未嘗總聚同參而已不能

掩其前言之謬矣。

子曰三人行章

呂留良云聖賢學問仰有掇俯有拾隨處皆有所取益今世謹愿之士深居支戶不肯見一箇不好人不知接遇不善亦儘有鍛鍊處講聖賢道理尚有掩却一半必不肯看一部不好書不知辨析羣言亦儘有受益處凡此只緣有箇我在正要兩邊辨別完全耳

凡言見不善如探湯見不賢而內自省皆謂適然相遭亦可借以自鏡非特尋箇不好人藉作他山之石也至勸善懲惡六經備矣刪詩不去鄭衛凡以示戒也佛經內典程朱亦嘗研求蓋欲得其旨趣而誥之也武侯教

後主讀申韓書。後儒且以爲譏。況名之爲不好書。則必其爲邪說淫詞。惑亂人心之言也。屏之不暇。而可涉其流乎。

子曰天生德於予章

呂留良云。天生此德於予。自無死桓魋之理。只在生德上看。非謂天生德後。又必保護此德也。旣生後。天更無保護處。但雖不保護。必無此死法。夫子亦只在德上信得真耳。

匡人其如予何。只在生德上言其理如此。此說本之朱子。然謂旣生後。更無保護處。則詩書所載保佑命之。及惠迪從逆。修吉悖凶者。皆不足信耶。

子曰仁遠乎哉章

呂留良云若謂此心纔提卽在此只說得心未可言仁也上蔡以知覺訓仁病亦坐此後來學術毫釐之差皆始於此仁者心之德心只是虛靈不昧故能藏仁非虛靈不昧卽仁也惟其虛靈不昧爲最活之物故有人心道心之分仁者道心也欲仁卽道心之動處故曰欲仁仁至

泛而曰心知覺之謂也知覺從形骸上起底爲人心從義理上起底爲道心。凡聖賢所言本心良心赤子之心皆道心也。道卽天所賦於人之理。仁義禮智是也。仁統四端言仁而義禮智該之矣。故曰仁人心也。朱子仁說云。天地以生物爲心者也。人物之生。又各得天地之心

以爲心者也。故語心之德。雖其總攝貫通。無所不備。然一言以蔽之曰仁而已矣。此章爲放失其心者言。放則遠。求則至。非欲者一心至者又一心也。朱子曰。自心自省。當體便是。此卽欲仁仁至之謂也。留良乃云。此心纔提卽在此。只說得心。未可言仁。又云。心只是虛靈不昧。故有人心道心之分。不知朱子釋大學明德之義。而曰虛靈不昧者。乃謂理與氣合。故至虛至靈。以具衆理而應萬事。是卽所謂道心也。是以孟子言學問工夫曰求放心。曰存其心。夫心存卽理存。豈非心與理一。本無不

善之明驗耶。言不義而受萬鍾者。云失其本心。夫失本心則爲不善。豈非得其本心則爲善耶。心之本善明矣。聖賢立教曰天曰道曰性曰理。此惟賢者乃能體之。若世間庸愚所認者。自己身心而已。必告之以心之本善。然後知天理人欲有主客之分。趨善從惡有順逆之殊。而徐導之易也。今若謂心者空空洞洞而已。善惡惟人所爲。則彼之恣睢騁驚。復何所已極耶。不以心爲本善。斯乃呂留良學術之大誤。欲矯新建之差。而不知與孟子之旨去而千里矣。

子曰文莫吾猶人也章

呂留良云文卽言也文行相須原無偏廢之理夫子只患奪志耳又云文原只是講所以躬行之理只爲學文人便將來但作說話說了程子所以譏其玩物喪志也爲如此若子以四教却是文作第一件弟子行有餘力則以學文朱子謂不學文則所失不止於固陋而已又何嘗不重文也近世學者恐文章之士易走作遂至以學文爲禁而所取悉皆鄙瑣不脛不脛之物卽有一二拘謹之士下梢亦無展拓只爲此章書看得不融貫將文行打作兩橛便生出多少病痛耳

纔說文卽是言又謂文行相須而以文爲子以四教之文則以學文之文是將自己之文與古人所垂之文混而爲一不知其何解也。

子疾病子路請禱章

呂留良云丘之禱久矣卽此見禱之有理卽此見禱之無益卽此見聖人之敬天持身旦明不失其辭氣之間如春水方至百川灌河絕澗枯渠無不充溢古人云學者最要識得聖賢氣象試從理會來

莊子云秋水時至百川灌河留良乃以秋爲春訛舛可笑卽朱子詩傳於蒹葭蒼蒼章內引此二句未嘗易一字留良豈亦未之讀耶

子曰奢則不孫章

呂留良云儉字尚從禮中出來儉非卽固也儉則固耳其間有漸積有流弊如晏子一狐裘三十年可謂之儉然君子作法於儉其失則固故禮不可不慎也

奢則不孫。儉則固。兩則字。口氣甚緊。與質勝文則野二句。皆直指其病之辭。若云上句當下卽是。下句由積而致。是兩事並論文法一樣。而意義各別。經書中從未聞有此等語也。曾子以晏子爲國奢示儉。而雜記載孔子之言。平仲與管仲並譏。一僭上。一偏下。僭上爲不孫。偏下爲固矣。禮無不中。過中一分。卽有一分不孫。不及中一分。卽有一分固陋。不孫與固。由一分至十分有積漸。而奢之不孫。儉之固。則無積漸也。胡雲峰謂與其奢也寧儉。是言禮之弊也。如此。與其不孫也寧固。是言弊之

極也。其終必至於此。意重在不孫一邊。然於經旨實不相符。留良竊其說。乃劃出奢之不孫。專言儉之固。則謬之又謬也。

子曰君子坦蕩蕩章

呂留良云。註中循理二字。是坦蕩蕩真本領。卽所謂本天者也。若只向心上尋。坦蕩蕩氣象。到得晉人說老莊止矣。

明道曰。君子坦蕩蕩。心廣體胖。伊川曰。君子循理。故常舒泰。一說互相足。天理卽心而在。故聖賢言心而理在其中。晉人之談老莊。直放逸縱恣。絕非坦蕩蕩之意。且

天光之發。天均之休。天倪之和。老莊之放逸。又何嘗不說天平。

曾子曰。以能問於不能。章

呂留良云。純乎無我。聖人也。尚有人我一間。在顏子也。又云。顏子之不校。渾然無非天理。晉人情恕理遣。總是私心。唐人唾面自乾。一發世情。狡獪矣。

朱子曰。聖人則全是無我。顏子却尚有個人與我相對在。又曰。顏子心理渾然。不待自反。物我一致。不見可校。留良之說。剽此。

曾子曰。士不可以不弘毅。章

呂留良云弘毅所以爲仁也。而弘毅之體卽仁也。不仁不能爲弘毅也。又云弘毅原從仁出。不弘毅正是仁虧欠處。又云秀才先不識仁字。枉讀四書。識得仁字。則士者仁之具也。弘毅仁之用也。任仁之事也。道仁之運也。七穿八洞。何處不見此理。

仁以理言。弘毅以心言。心體無一毫拘蔽。此理方有安頓處。時解以弘毅卽作仁看。誠欠分晰。而留良直謂弘毅從仁出。不更謬乎。又云士者仁之具。弘毅仁之用。任仁之事。道仁之運。總是一派混話。何曾有一字道著。

子曰興於詩章

呂留良云。凡以此章爲經學者。俗學之見也。彼看詩禮樂固自輕淺。以爲心學者。異端之見也。彼亦看得

詩禮樂輕淺然俗學之輕淺猶不敢畔道若異端之輕淺則敢於無忌憚矣蓋詩禮樂本天興立成本心必心本於天乃能成材合道若謂吾心自有興立成吾心自有詩禮樂卽以心爲天矣

先王以詩書禮樂造士其時有其教而未謂之經及夫子刪述六經編爲簡策乃號之爲經其名雖殊而其爲教一也名曰經學有何害耶程子於誦詩三百一章云窮經將以致用也亦以詩爲經可曰俗學之見耶且曰經云者聖人以常道教天下萬世而名之也以詩禮樂爲經學尊之至矣如何反云看得詩禮樂輕淺耶以此爲心學者亦未全非何也詩禮樂之名物度數固有資

於外。而其理固未嘗不本於心也。孔子曰。詩三百。一言以蔽之。曰思無邪。記曰。心中斯須不和不樂。而鄙詐之心入之矣。外貌斯須不莊不敬。而易慢之心入之矣。是三者本於心之明文也。如何。一曰心學。便是異端之見。看得詩禮樂輕淺耶。又云。詩禮樂本天。興立成本心。必心本於天。乃能成材合道。若云吾心自有興立成。吾心自有詩禮樂。卽以心爲天矣。此非知理之言也。夫詩禮樂者。聖人所以教人之具也。興立成者。學者進於道之節次也。其理皆本於天。而具於人心。豈得判而爲二哉。

留良好言本心。本天之辨。蓋竊取伊川程子之言。云聖人本天。釋氏本心。每據此以爲說。夫所謂聖人本天云者。特言其本則然耳。中庸所謂天命之謂性。董子所謂道之大原出於天是也。自繼善成性而後。則所謂天。之理者。固悉具於人之心矣。孟子所謂仁義之心。惻隱羞惡恭敬是非之心。張子曰心統性情。又曰合性與知覺有心之名。皆卽心以明理之妙。亦何待揀去心字。而後可以闡本天之旨耶。留良未達其本。而好分門戶。樹標幟。以自神其說。豈非古人所譏道未足而強言者歟。

子曰如有周公之才之美章

呂留良云此章大意甚言驕吝之不可耳不關才事若謂有才者不可驕吝豈無才者不妨驕吝乎蓋緣天下驕吝之病大約生於小有才者故夫子以才立說又云驕吝生於才無才則何驕吝之有韓子所云傲雖凶德必有恃而後行謝上蔡所謂去箇矜字不得者也然世間驕吝之人儘有不必有才者但當責其驕吝不當醜其無才假令有才而卽可以寬假驕吝之罪則於周公之才之美當何如耶

朱子曰此是爲有才而無德者言又曰聖人只是平說去如有周公之才美而驕吝便連才美壞了况無周公之才美而驕吝者乎甚言驕吝之不可也留良勦此爲說乃又云不關才事世間驕吝之人儘有不必有才者

則與其所云驕吝之病大約生於小有才及所引有恃而行之說自相矛盾矣。

子曰大哉堯之爲君也章

呂留良云上節言其德故曰民無能名下節指其勲業正謂可得而名者此耳仍要牽合無名則天不分德業一派混話皆講章不通之說

下節可得而名尹氏已明言之固不必牽合無名然成功文章是就則天中抽出一二言之李光地謂上節註中德字包業在內蓋兼體用言之堯之德不可名其可見者此耳猶云堯難名之德此其可見者也留良謂上

下節判分德業將成功文章。劃出在則天之外。此固執不通之論也。

舜有臣五人而天下治章

呂留良云不曰文王之德而曰周之德此周字兼武王對唐虞而言不獨周之才可以繼唐虞周之德亦未始遜於唐虞也。又云武王順天應人不得已而爲之聖人之德也文王可爲而不爲聖人之至德也。武王牧野以前亦同文之至德後乃迫於時耳不曰文而曰周末嘗除武王也。

語類問文王三分天下有其二一段據本意只是說文王或問中載胡氏說又兼武王而言如何曰也不消如此說而今都回護聖人也不得如東坡罵武王不是聖

人又無理。只是孔子便說得來平。據此。自以集註單指文王言者爲正。留良一則云周字兼武王。再則云未嘗除去武王。且云武王牧野以前。亦同文王至德。紛紛置辨。若惟恐此節之爲武王累。而曲爲回護者。此徒勦胡氏舊說。而不曾知有集註之定解故也。

子罕言章

呂留良云罕言與不語無言不同。不語無言有箇教旨。在罕言只是記者旁觀見得此數者。夫子言之甚少。便類記之。不是夫子有箇教旨與人猜也。故三件類記而不倫。同一罕而所以罕之故。正自不同。若欲求合一之說。則穿鑿傳會害道不小矣。

朱子曰。罕言利者。凡事循道理。利自在其中。如利涉大川。利用行師。豈不言利。所以罕言者。正恐人求之。則害義矣。罕言命者。吉凶禍福皆是命。若儘言命。恐人皆委於命。而人事廢矣。罕言仁者。恐人輕易看了。不知切已上做工夫。然聖人若不言。則人又理會不得。如何是利。如何是命。如何是仁。故不可不言。是三者之罕言。卽夫子教人之微旨也。今云不是。夫子有箇教旨。與人猜。又云同一罕。而所以罕之故。正自不同。旣有所以罕之故。是卽夫子之教旨也。且或問云。三者皆理之正。有何不

同。而以記者爲類記不倫乎。

太宰問於子貢曰。夫子聖者與章。

呂留良云。古來聖人中。只周公孔子。直是別周公之多材多藝。孔子之多能。皆衆聖人所無。雖不以此損衆人之聖。然周孔分外不可及。實如此。知此方見子貢知聖已到至處。又云。孔子不特多能異乎羣聖。看天縱二字。則聖處已自不同。孟子所謂集大成。生民未有。可見卽所謂多能。若是尋常技藝。聖字中孰不統攝。惟周孔之藝能。皆足經緯天地。利用萬物。故多能又與聖字分說也。

朱子答或人之問云。太宰以多能爲聖。子貢以多能爲聖人餘事。是聖字固另提起說矣。又問。此是聖人賢於堯舜處否。曰。也不須如此說。賢於堯舜。却在收拾累代。

聖人典章禮樂制度義理以垂於世。不在此等小小處。非所以論聖人之優劣也。留良乃以多能爲經緯天地。利用萬物。故與聖字分說。試問經緯天地。利用萬物。非聖人而能之乎。且周孔而外。如堯舜禹湯。豈得不謂之經緯天地。利用萬物者乎。留良又何以云多能皆衆聖人所無。而亦不以此損衆聖之爲聖也。

子曰吾有知乎哉章

呂留良云此節通指誨人說。蓋謙言已無知識。正對人而言。不是自責自勵語。又云說無知。便見其求知。說告人無不盡。便見其求知無不盡。聖人成已成物。仁智並到。無知二句。固非元妙說法。亦非謬執謙

言
退也。又云有知卽是生知。上知之謂人以夫子誨人無所不知而稱之。故夫子遜謝以爲無知。只告之不敢不盡耳。非謂毫無所知也。卽辭生知而居敏求辭聖仁而居爲誨之意。

留良謂此節通主誨人說。蓋謙言已之無知。正對人而言。非自責自勵語。是已。又云說無知。便見其求知。說告人無不盡。便見其求知無不盡。則仍涉自責自勵語矣。何其胸無定見。信口枝梧也。至云有知卽生知。上知之謂果爾。則夫子何不曰我非生而知。而但曰吾無知乎。顏淵喟然歎曰仰之彌高。章

呂留良云。或謂首節卽說。做道不可幾無所用力。恐與末節無分子。謂原不須分此節。只贊聖人之道。統

前後而言須知顏子至此興歎原先有末節而下此節但此節自言其難處却在聖人身上說末節說聖道終不可及處却在自己身上說則無分而有分矣

朱子以高堅前後爲一關所立卓爾爲又一關前是高妙難見得親切後是親切難至於從容也喟然之歎雖因末節而有然以爲首節贊聖道統前後而言則是卓爾未由仍然高堅前後之見也乖謬甚矣又自知前後混淆無別乃強爲之說曰首節言其難處却在聖人身上說末節說聖道終不可及處却在自已身上說則無分而有分矣夫無方體無窮盡者聖人之道也化不可

爲者。獨非聖人之道乎。顏子始而見其如此。旣而見其如彼。此由學問功候之淺深。而留良判爲首節屬聖人末節屬自己。此所謂窮而遁也。

子貢曰有美玉於斯章

呂留良云惟其當沽所以必待賈

玉自當沽。而沽必待賈。語意自有兩層。今云惟其當沽。所以必待賈。則反而言之。將曰若不當沽。卽可不待賈乎。此似欲逼緊一層。而不知語氣之不順也。

子曰歲寒章

呂留良云有匹夫匹婦之後凋有離物絕俗之後凋有畸節獨行之後凋有賢智忠孝之後凋有聖神之後凋只一箇後凋中品位正自不同見識到得一種纔做得一種出

聖人以松栢喻君子之持守堅定未說到神聖極至處卽以木論後凋者固不止松栢然本文明說松栢後凋只應就松栢言松栢不必推及他木亦無容別其爲何等松何等栢也留良於燕居章云其間高下等級正多於絕四章云無字中精粗等項亦多此又云後凋中品位正自不同不解其何故必與本文作拘而好爲此搜剔分別也。

唐棣之華章

呂留良云言思便是言理論者必以理爲腐而粘住思人說此正迂腐之至又云夫子借詩言而反之就思人教思理離脫思人固非膠定思人亦非也夫子一言蔽三百曰思無邪蘇氏謂爲詩者未必知此夫子斷章云爾夫駟詩義在思馬說詩豈必泥思馬乎是求廓而反室矣

詩曰爾思曰室遠豈得謂非思人聖人引詩而言思則不遠。自指理說。留良以粘住思人說爲迂腐。又云夫子就思人教思理。脫離思人不得。膠定思人亦非。支離朦混。殊不可解。至云駟詩義在思馬。雖初學兒童。亦知其說之謬也。

孔子於鄉黨章

呂留良云鄉黨宗廟朝廷兩者分記是聖人之中禮兩者類記又是聖人之不測合兩節看乃見聖人全體

聖人周旋中禮。卽一舉一動。俱可見聖人全體。所以記其不同者。正要人於不同處。叅看出聖人之所以各中乎禮耳。留良乃謂兩者類記。見聖人之不測。則謬矣。聖人進德淵微。則有神而不可知處。化民成俗。則有過化存神而不可測處。若夫鄉黨卑讓之禮。會朝表著之言。乃秉先聖之禮。酌交接之宜。何不測之有。此種議論。所

謂飾智以驚愚求深而反淺也。

執圭章

呂留良云上如揖下如授兩句一併讀以形容手容之平耳是記者度量高卑之數非夫子有時而上下有時而下也

門人問朱子云。旣曰平衡。而又有上下者。步趨之間。其手微有上下。但高不至過揖。下不至過授否。曰得之。是原說手之稍有上下也。今云非夫子有時而上下。豈聖人手容。畫然一定。略無移動者乎。

